

Fols d'uolp danvonz?

(fmr/hh) Il coronavirus ha era frenau la fiera da fols d'uolp a Tusaun. Tonaton han els scumiau maun. Sco quei ch'ils catschadurs *Gerasmus Tenner* e *Rinaldo Giger* han detg enviers la FMR han ils fols saviu vegnir vendi era uonn. Ina part ei vegnida cumprada d'in commer-

ciant ch'era presents mintg'onn era alla fiera a Tusaun. Il hanletg cun fols d'uolp ruaussa il mument. Tenor il commerçant *Peter Hofstetter* da Flawil ei quei ina consequenza dil coronavirus.

➤ PAGINA 3



Fols han scumiau maun ils davos onns per rodund 5 francs. FOTO H. HUONDER

Denter 7000 ed 8000 fols en frestgera

Era la fiera da fols d'uolp d'uonn a Tusaun ei daventada l'unfrenda dil coronavirus

DA HANS HUONDER/FMR

Era senza la fiera a Tusaun ha la gronda part dils fols dallas uolps sittadas alla catscha da laghetg igl unviern vargau anflau cumpraders. La fiera internaziunala per quei product ei denton inexistentia il mument pervia dil coronavirus. Dapi igl onn 1998 san catschaduras e catschadurs dil Grischun vender lur fols d'uolp, fiergna e tais alla fiera regiunala da primavera a Tusaun.

Quella fiera era vegnida fundada in onn avon dalla Secziun da catschadurs Traversina ed il grond interess ha intimau ella d'integrar en quella era ina fiera

da fols. Aschia eis ella daventada ina platafuorma da commerci pils catschadurs ed ils cumpraders da fols ed ei stada naven digl emprem onn in grond success. Mintg'onn scumiavan ver 2000 fols d'uolp maun, leutier in tschappel fols da fiergna e tais. Mo buca mo quei: La fiera da fols a Tusaun fuorma aschidadir la finizion dalla stagiu da catscha. Pils catschadurs passiunai entscheiva quella igl emprem da settember cun la catsch'aulta, cuntinuescha cun la catscha bassa e naven digl emprem da november entochen la fin da fevrer suonda la catscha da laghetg. Quels ch'han la vegliadetgna necessaria ed il cletg san aunc serender igl october alla catscha da capricorns. La catscha da laghetg ei ina pissiun tut speciale e quei han ins saviu constatar ils davos onns allas sentupadas a Tusaun. Catschaduras e catschadurs da lunsch e da maneivel arrivavan leu culs fols dalla catscha dils meins avon. Tut auter ei quei stau uonn. Muort la situaziun cul coro-



Ils catschadurs da Breil Gerasmus Tenner (sen.) e Meinrad Cathomen avon entgins onns alla fiera da fols a Tusaun.

FOTO H. HUONDER

navirus ha la fiera buca saviu vegnir organisa. Per las catschaduras ed ils catschadurs da laghetg ei aschia setschen-tau la damonda tgei far culs fols.

Tonaton in commerci

Sunter che l'uolp, la fiergna ni il tais ein sittai vegn la pial digl animal tratga giu. Ella vegn lu stendida e secentada. Il catschadur sto dar quitau che vermaneglia tachi buca la pial. Igl unviern cun tempe-

raturas freidas ei il prighel persuenter buc aschi gronds, mo ei sa tonaton capitär. En quella fuorma vegnan ils fols lu vendi a commerciants ni outras personas professiunalas pil nez per exemplpel da mantels ni cozzas da letg. San ils fols buca vegnir vendi la primavera ston els vegnir deponi per exemplpel en ina frestgera. «Da temperaturas normalas smarscheschan ils fols damai ch'els vegnan taccai per exemplpel da maulas ed ein lu buca

duvrabels pli. Per saver conservar vina-von els ston els vegnir preparai professiunalmein ni magasinai el freid», di Peter Hofstetter da Flawil. El ei in dils commer-ciants che separticipescha mintg'onn al-la fiera a Tusaun. Damai che la fiera ei buca vegnida organisada uonn eis el seren-dius per part directamein tiels catschadurs per cumprar ils fols ni che quels ein vegni tarmess ad el. Aschia en Val Medel. «Nus havein giu la caschun da vender nos

fols ad el ed essan leds e cuntents che quei ei stau il cass. Autramein havessen nus stuiu dismetter quels», di Rinaldo Giger da Pardé. En in auter liug ha Gerasmus Tenner da Breil saviu furnir ils fols sco era quels d'entgins collegas: «Nus havein saviu vender els ad ina cusunza. Aschia sa-vein nus era ch'els han ina funcziun futu-ra. En sesez ei quei stau in grond cletg.» Pils catschadurs ei la vendita dils fols mo ina vart che la fiera a Tusaun purscheva. «Igl ei era ina buna caschun da sentupa-da», di Giger.

Tgei succeda culs fols?

Hofstetter cumprava per ordinari denter 4000 e 6000 fols per onn ell'entira Sviza-ria. Uonn ein sulettamein rodund 3000 vegni en siu possess: «Per far catscha d'uolps ei igl unviern buca staus buns. Leutier ei vegniu constatau la malsogna dalla rugna en differents loghens. Damai ch'ils prezis per fols ein fetg bass vegnan las pials per part gnanc tratgas giu.» Il prezi pil fol d'uolp en Svizra mutta il mument entuorn tschun francs, per la fiergna vegn francs e pil tais diesch francs.

Denter 7000 ed 8000 fols ein maga-sinai il mument en in local da frestgera tier Hofstetter. Tgei che succeda cun quels sa el il mument buc. «Sin funda-ment dalla situaziun cul coronavirus ei il hanletg persuenter buc avon maun. Co ei vesa ora egl avegnir saiel jeu buc e sche la situaziun dils prezis semida buc ils pro-xims onns stuein nus insumma sedumandar sche nuslein cuntinuar cun quei commerci.

Enzacu ei quei era ina damonda eco-nomica», di Hofstetter ch'ei la tiarza ge-neraziun dil menaschi da famiglia ch'ei vegnius fundaus 1927. El venda ils fols sigl entir mund.